



Godattiyo Malalone Arbbo

Leveled



Ha gujo nabbabo maxaafay Yuu Essi Eyidiyappe (USAID) beettida miishshaa maaduwan Seev Ze Childdirenee (Save the Children), Luxettaa Moconaynne Tohossa Dalgga Manttiya Luxettaa Beeroy issippe hashetin giigidi attamettidaagaa.

2009 M.L.



USAID
FROM THE AMERICAN PEOPLE



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>




Godattiyo Malalone Arbbo

Kifilee 3

Saaminttay 30

Leveled



Nabbabuwappe kasetiya Mali be'o Oyshaa

Ha huuphe yohuwanne misiliya xeelliyo wode
kaalliya nabbaboy aattiyo kiitay ayba gaada
qoppay?



Godattiya Malala gixeto afalaa wogga adussa
danccuwan yuushsha aattada danccaydda bari
na'iyo Arbbo xeesaasu. Xeesidaara, "Bii Arbbee,"
giini Arbbakka, "Yee, taayee," gaasu. Yaatin
Godattiya Malala "Taani hachchi nena giyaa
efaana gaada qoppaasishin ellellada giigana
danddayay?" gaasu. Yaagin Arbbakka hagaappe
kase giya giyobaa biidi yiida asay haasayishin
siyawusuppe attin mule ba erennaara bari
hayttaa ammanabeeekku. Qiibaa qoppa ekkiyo wode
giyaa biyo qaaday imettido gishshawu ufayssaa
poocammiyogaa doomma aggaasu.

Ufayttada aayee oyshaa waata giigissa zaaranaakko qoppaa qoppada siyabeenna uradan wotta yeggada, “Woygadii, taayee?” gaada guyye oychchaasu. Aaayiyakka, “Ta na'ee iitawu kehawukka giyaa zal”idi eriyogee lo”o gidiyo gishshawu hachchi nena giyaaefaada bessanawu qoppaas. Ha”i neeni ellellada giiguuteeshsha gaada gaystennee,” gaasu. Arbbakka siyidoban keehi ufayttidoogaa erissennan agganawu maliyogaa doommaasu.

Yaatidaara loddaara, “Ee taayee, elle maayaagikkinaa ay cora maayuwa maayiyogee gam”ettii?” gaada ubba haa eesoyaasu.

Gujjadakka, “Hegeekka hegaashin keetaa O bolli olidi baanee yaanin?” gaasu. Godattiya Malalakka attuma naata qoppa ekkada, “Keettawu qoppoppa Adeeminne Marccu de'oosona,” gaasu akka na'ee ufayssaa erennaba milataydda.

Yaagin Arbbakka, “Ero yaanikko, nuuni yaanaashin kawuwa kattidi naaganaadan neeni yoota.

Omarssa tukkiyakka essidi naagiyakko lo”o taani maayays,” giidaara kushiya tohuwa meecettada maayuwa maayiyogaa doomma aggaasu. Arbba kushiya tohuwa meecettaydda giyaabaa asappe siyidobaa ubbaa qoppawusu. Issitoo giyaa zattiya asaa coratettaa bari huuphe giddon heregawus. Simmada qassi ogiyan caani ekkidi woxxiya hariya baluquwa, maggaayiya, maaxaanaa qoppiyo wode sugi oliyaba milatees.

Asay bayzzanawu efiyo meheekka qayci yeggidi yedhdhi aadhdhanaba milatin ha”i qaycirgidabandan dagamaa loccu gawusu. Arbba hegaa wottishin denttishin meecettiyo wode keehippe aduqqinnee giyaa biyo wodee sugettidi poo'in Godattiya Malala yiillotada hanqettaasu.

Yiillotada, “Bii Arbbee, shimppilla meeccayiyye?” gannee zambbiiliya goochchidaara Arbbo olada zago soo makkaanaappe aadhdhana hana aggaasu. Yaatido Arbba keehippe dagammada, “Taayee taani giigaychchaasittennee, gatta,” gaydda geeduwa wottaa piddi gaagaasu. Hegaadan wottaa juujada Wozggano godaa kare gakkishin guyyeera gakka aggaasu. Godattiyakka guyye xeellidaara miichchaa pohu gaada, “Hegaassee neeni meechcha darissiyoy?” gaada qilliicaasu.

Yaatin Arbbakka meechchay bollaa payyatettawu gidin puulatettawu koshshiyogaa yootaasu. Yootin aayyiyyakka yohoy tuma gidiyogaa boxooxissada Arbbo anjja simmin harabaa kaa'iyogaa doommi aggidosona. Hegaadan kaa'iiddi erennan Illaafi pudettay aynne milatennan Dadiso na'aa Erppaara kanttidid Doogen kiyi wodhdhidosona.

Yaagidi yaagaa haagaa denttidi kaa'iiddi biishin
ogiyan demmidobaa ubbaa Arbbaa aayyiyo
oychcha oychchada siyawusu. Issibaa demmada,
“Taayee hagee aybee? Taayee hegee aybee?”
ga gaada Arbbaa oychchin Godattiya yootawus.
Yagiiddi Dooge Mashido koyro xekka luxetta
keettaa gakkin, “Taayee hagee aybee?” gaasu.
Godattiya Malala, “Ta na'ee, hagee luxetta
keettaa geettees. Naati hagawu yiidi machchallaa
luxoosonatennee,” gaada yootaasu.

Yaagin Arbbakka kaalliya layttan luxetta keettaa
gelanawu qoppaasu. Qoppidaara, “Taayee yiya
laytti taani hagawu yaada luxanawu de'iyanaa?”
gaasu. Aayyiakka, “Ee, ta na'ee Xoossi saro
shaachchikko hagawu yaasa giidi Nuunikka
qoppiiddi de'eettees,” gaasu.



Hegaa siyada Arbba ufayssawu miichchaa noocu gaydda biishin caana mehee, kace mehee, dorssay deeshshay giyaa efiyogee sham"i gees. Yaatin A sooni qoppidobaappe baggay, kace mehee oyqqida asaa kushiyappe kessi ekkidi ikko yiyyaba milatin aayekko shiiqawusu. Caana meheekka bari toohuwa giyaa gattidi shemppanawu woxxiiddi issoy issuwara sugettiyagee okka sugi olanaba milatin keehippe yayyawusu. Hegaadan eti biishin Zaamine Saynno giyay sinttan beettiyorin Arbba keehippe dagammada, “Taayee asaa!” gaasu. Yaagin aayiyakka, “Eettennee, giyaa gakkida,” gaada zaaraasu.

Yaagiini, Arbba giyaa asaa coratettaanne woxxi qaaxxabaa ubbaa be'ada maalaallettaasu. Bari aayyiyo, “Taayiloo, hagee ayba yaa'ee I woni?” gaasu. Aayiyakka, “Hagee yaa'a gidenna giyaa gidennee?” gaasu. Yaatin Arbba aayee geedo kaalla kaallada giyan dumma dummabaa do'o aadhdhada ubbabaa maalalettada xeelliyyogaa doommaasu. Yaataydda tukke xaliya bayzziyo sohuwa biyo wode Baalooma uttada barina dooddida asaassi naatiraa aguppiya, keppuwanne deebbuwa bayzzawusu.

Yaatin bagga bagga asay, “Ta michchee yeggikkii waanay hagan naatiray mule baawattennee,” gees. Baggay qassi, “Hagan xalotee anee? Taagee miishsha gidenneeyye yeggarkkii neeyyo Xoossi immo,” giyo wode Baafannakka, “Hekko hegaa be'a,” gawusu.

Arbba Malala shammanawu aadhdho do'uwan ubban aayyiyo xeesa xeesada oychchishin oyssa do'uwa gakkidosona. Gakkiyo wode oyssaa wachchi wachchi shammiya asaa be'idaara miichchaa kessa ekkada wodhdha aggaasu. Yaanin asay na'iya waanadee aybissi miiccay giidi aggi simmin miichchiya oyshaa aayyiyo oychchaasu. Aayyiyo, “Taayiloo, asay oyssaa waatii hagaani? Oyssikka giyaa geliiyye? Yaanin nuunikka aybissi ekkidi yookkoo,” gaada oychchaasu.

Na'ee oyshay barina keehippe maalaalissidoora Godattiya Malala, “Taa aawaa Mallaqo! hanna na'iya eeyyeeyye? Nu sooni nuussi injjetin oyssaa sooni meettees, tistteettees. Oyssi giyaa yeenna giiday oonee? Hegaa ne aaway Ayyaanu siyoppo Arbbee,” gaasu.

Arbbakka, “Siyikkonne waatii, erennabaa oychchidi luxiyogee Maallan Dogalan de’iyaba gidennee? Taani neeni nu sooppe giya ehaada bayzza erenna gishshawu gaasippe attin ay mooridanaa? Neenikka taayee ubbabaa odada meezyeyanaassa gidennee, tana giyaa ehiidoy? Eha makkada taani oychchiyobaa ubbaa aybissi salettay? Hegaa gidikko taani hara gallassi giyaa mule yiikke,” gaasu. Yaagiiddi issi sohuwara aadhdhishin ha’ikka ashawa bayzziyo sohuwa gakki wodhdhidosona.

Hegaani ashawa be’idaara guppannee ashawa arssan uttanawu kiyiyogaa doomma aggiyorin Malalissi haniyobay leeli aggiis. Woxxada oyqqada essana geennaadan na’iya na’a gididaara baychchidoogee Malalissi meto gidiis. Ha’i aybanne oottanawu danidayikke giyo hanotan gelaagaasu.

Yaatin Godattiya giyobi xayidoora kushiya doonan wottada, “Mallaqu biyyiya tanee! na’iya waanay?” gaydda eqqa aggaasu. Giyobi xayin eqqido sohuwan, “Bii Arbee, hegee asabatennee, haaya taani neeyyo shammana,” gaasu. Yaagin axaaree, “Aybinne baawa Godattee, ta na’iyo taani miza kalissada yeddana. Neeni hanqgettoppa na'a gidekkee ay eray?” giis.

Yaagidaagee, “Hey ma ta na’iya anjjo neessi. Tufh tufh! ma taani neeyyo muxana,” giidaagee ashuwa muxi muxi miziyogaa doommi aggiis. Godatteessikka axaariya anjjiyo qaalay xayin qoppaa qoppada, “Xoossi immo neessi. Ane tawu soossikka naa”u madafaa loytta xeellada bayzza,” gaasu.



Hegaappe simmidi giya giddon shammiyobaa maxiniya, bambbariya, shuquwa, huuphiya meediyo shiggiriya milatiyabata ubbaa shammi ekkidi soo kiyigidosona. Soo kiyishin ha giyaa caanettidi yiida haretuppe naa"ati caaggiyorin hinkko haretu ubbay wodoruwa duutti duuttidi woxerettiyyogaa doommi aggidosona. Hegaani Arbba dagammada wontta sooni qoppidobay hanana hanees gaada yayyada aayee kushiyen shikiliilaydda yuuqi yuuqiyogaa doomma aggaasu. Haretikka kaseegaappe haa darissinnee palabaa kessiyorin haretu hanotaa be'idi maggaayetinne maxaanatikka shabbiretti aggidosona.

Hegaadan hanin eta goda gidiya asay ubbay oyqqana giinikka mulee piskki giidi shoraa xayinnee giyaa laaliyogaa doommi aggidosona. Hegaani asay ubbaykka bari siiriyara siiriyara woxxi woxxidi qosettiigiis. Asay dumma dumma ginaara bari shemppuwawu woxxi woxxidi qosettishin Godattiya Malalanne Arbbakka issi baggi simmidosona. Eti keehinne shabbirettennan issi ginaara loddan baaranddaa gelidi eqqiigidosona.

Hegan eqqidi asay issoy pude haray duge woxxiyagaanne hariyappe kessi ekkiyo wode maggaayee maxaanay daganttiyogaa be'idi miiccoosona. Yaatishin warettiya hareti issoy issuwa qakkiiddi oyssa do'uwa geli aggidosona. Gelinnee asay bari huuphiya ekkidi woxxiichcho sohuwan de'iya oyssaa yereretti aggidosona.

Hareti oyssaa yeretta xalla gidennan tohuwara gobbaa goochchi goochchidi issuwa oyssaa haraagaara walakeretti aggidosona. Ha dirbbay aadhdhanaashin giidi baaranddan eqqidaashin Arbba bari wozanan hachchi tana giyaa aybi ehiideeshsha gawusu. Issi baggaara sa'ay qammi qammidi biyogeeekka qofissin, “Taayee sa'ay qammiichchiisittennee wanabee?” gaasu. Godattiya Malala Arbbi oyshaa zaaranawu metootaydda O minttettiyogaa doommaasu.

Hegaadan hanishin warettiya mehiya godati ubbay bari mehiya mehiya biittaa achchan gaashidi oyqqi oyqqidi qachchin sa'ay woppu giigiis. Hegaappe simmin asay ubbay bari oli oli biido zal"iyakko guyye yiyo wode ubbabay maaraa mankkaa xayi uttiis. Hegaa bolli de'iya buquray awuggee oogaakko erettennaadan moorettiis.

Yaatin asay qiiba malaataa kaalli kaallidi, “Hagee taagaa, hegee neegaa,” gi giidi gishettiyogaa doommiis. Yaatishin oyssa do’uwan naa”u zal”anchchati palamaa sheekki aggiyorin asay ubbay haretubaa dogidi eta giigissanawu etakko shiiqiis. Godattiya Malalakka shiiqada, “Ta naatoo, ooyettoppite; loyttidi akeekan xeellidi intteegaa intteegaa ekkite,” gaasu. Hara asaykka, “Godattiya giyogee likke, issoy issuwara palamettiyyogee aybanne maaddenna, shiiqidi haasayiyogee lo”o,” giis.

Hegaa siyada Arbba, “Taayee, shiiqidi haasayin metoy elle birshshettiyye woni?” gaasu. Aayiyakka na’iya haasayaa go”aa na’atettan eridoogee kehippe ufyassin qonccissada zaaruwa doommaasu. “Eettennee Arbbee, asay merettiya metota haasayidi birshshiyogee kehippe lo”oba,” gaasu Godattiya.

Ha zoriya ekkidi asaykka palamaa aggiigidi bantta oyssaa oyssaa suure kase sooppe ehiidobaa malaataara gattidi akeekiyogaa doommidosona. Yaatishin baagee hankkoriigaa giddo gelidobadan palamettiyara, “Taagee hagaa gidennan aggenna,” gaada ekkin hankkoriyakka sirphphi gaada ekka aggaasu. Hegaappe simmin giyan oyssa do'wan saroy wodhdhin heeran harabaa bayzziya asaara ubbay saruwa demmiis.

Bukkay carkkay aadhdhin Godattiya Malalanne Arbba hanidabaa denttidi miicciiddi soo kiyi aggidosona. Soo kiyiyo wode Arbba ashawa zambbiliyan goochchin aayyiya Godattiya Malala qassi hara zal"iya oyqqaasu. Hegaadan hanidi yiishin Arbba, “Taayee hachchi tana giyaa bessana gaada ehaada maalaaliyabaa bessadasa,” gawus.

Malalakka maraccee wooqqin miiccaydda, “Ta na'ee hachchi giyay tumukka waanidaakko maalaalees,” gawus. Yaagiiddi Illafi dugettaa wodhdhidi Wozggano godaa kareera yiidi kaamiya ogiya gakkiyo wode Maatafiira Batturiira xade heerappe yoosona. Yiyageeta Arbbiira aayeera saroti simmidi kaa'iiddi so gakkiigidosona. Soo gakkiyo wode Arbaa giyan hanidabaa odanawu miichchay tucciyorin miiccaydda ashawa shidhdhan wottannee aawaakka sarotennan utta aggaasu.

Yaatin aawaykka, “Hala ne shoraa xaya. Bii Zaamine Saynnoy waanii aybaa be'adii ane nuussi yoota,” giini naatikka odanaadan shoobbin odidoogeeti miichchaa wodhdhi aggidosona. Wurssettan aayyiya giyaa eriyogee ay gidikkonne lo'o gidiyogaa yoota simmin ashawa miidi zin”i aggidosona.

Nabbabi simmidi zaariyo oyshata

Nabbabuwaninne ne buzo akeekan amppada
kaalliya oyshata zaara.

1. Giyaa giyogee aybee?
2. Asay giyaa aybissi bii?
3. Giyan de'iyabay aybee aybee?
4. Giyay baynnaakko asay waananawu de'ii?
5. Nabbabuwa giddon “palamettiyogee” giya
qaalawu gelo birshshettay aybee?

